

## लफाफा संस्कृति दियां करामातां

□ डॉ० सत्यपाल श्रीवत्स

लोकतन्त्र दे इस युग च स'ब्बनी गी हक्क पुजदा ऐ जे अगगैं बधन ते तरक्की करन, अपना बस्तार करन ते अपनियां लत्तां अपनी मर्जी दे मताबक फलान।

विश्व स्तर पर विज्ञानक ते तकनीकी तरक्की दे कन्नै-कन्नै सभ्यता ने बी तरक्की कित्ती। लोकें दियां सुख-सुवधां-बधियां। बिजलियां, नलके, सड़कें बगैरा दा जाल ग्रां-ग्रां च ते घरें-घरें तक बिछी जा करदा ऐ। जगह-जगह स्कूल सरकारी बी ते इंग्लिश मीडियम आकर्शक ते लच्छेदार नां आहलियां अकैडमियां बी दड़ा-दड़ खु'लदियां जा करदियां न। निक्के-निक्के जागत-कुड़ियां उल्टी-सिद्धियां गंढी (Knots) देइयै टाइयां ते स्कर्टां पाइयै 10-10 किलोग्राम दे बस्ते चुक्कियै इनें अकैडमियें पाससै द्रौड़दे लभदे न। उद्धर बड्डे-बड्डे शैहरे च दैत्याकार कारखाने खु'ल्ला करदे न जिंदे च दिन-रात केई किस्में दे माल-मत्ते ते घरेलू लोड़ा दियां चीजां त्यार होआ करदियां न। गल्ला दा लुब्बे-लुवाव एह ऐ जे हर-पासै विकास गै विकास होआ करदा ऐ। नेही हालती च जरूरी हा जे विश्व-संस्कृति बी अपनियां लत्तां फलांदी, अपनियां सीमां अगगैं बधांदी ते नमें-नमें रूपें ते शलैपें कन्नै साढे सामनै औंदी। चित्तरकला, संगीत, मूर्तिकला ते वास्तुकला दे खेतर च ओह जरूर अगगैं बधी ऐ ते उन्न उनें खेतरें च नमें-नमें आयाम छूहियै प्रशंसा ते बाह-बाही हासल कित्ती ऐ, पर बदलदे युग दे प्रभाव च आइयै ओह नमें-नमें नाएं कन्नै अपने नमें-नमें रूपें, उपरूपें ते अपरूपें कन्नै बी सामनै आई ऐ। एह बी इक खुशी आहली गल्ल ऐ जे उन्न इनें रूपें, उपरूपें ते अपरूपें आहले अपने चेहरे गी विश्वव्यापी रूप देइयै अन्तर-राष्ट्री मान्यता हासल करी लेई ऐ। हल्लें तक इसदे जेहडे उपरूप ते अपरूप सामनै आए न ओह इस चाली न-अंकल-संस्कृति, बोट संस्कृति चाह-संस्कृति, चापलूस-संस्कृति, मीटिङ्ग-संस्कृति, पॉप संस्कृति, लफाफा-संस्कृति ते गण-संस्कृति। संस्कृति दे एह सारे गै उपरूप अपरूप अज्ज बड़े मशहूर होई गेदे न ते अपना-अपना प्रभाव फलाने ते पैर जमाने आस्तै जद्दो-जैहद करा करदे न। संस्कृति दे इनें उपरूपें ते अपरूपें गी दिक्खियै इयां सेही होंदा ऐ जे एह संस्कृति भगवान् दी योगमाया कोला घट्ट नेई ऐ जेहड़ी केइयें रूपें च संसार च आइयै अपने प्रभाव ते चमत्कार दसदी ऐ। इत्थें अस फिलहाल इसदे दूए रूपें दा गल्ल छोड़ी दिन्ने आं। उंदे वारे च चर्चा कुतै फही करगे सिर्फ लफाफा-संस्कृति दे चमत्कार ते करामातें वारें चर्चा करन लगे आं। एह ते सब जानदे

न जे लफाफा-संस्कृति अज्ज साढ़े जीवन दा अंग बनी गेदी ऐ भाएं इयां आखो जे पर्याय गै बनी गेदी ऐ। जियां अस जिंदगी दियें होरनी चीजें दे बगैर नेई रेही सकदे उआं गै लफाफें दे बगैर जीना बी मुहाल होई सकदा ऐ। हट्टिया दा भाएं चौल, आटा, दालीं बगैरा आहननियां होन, भाएं-फल, सब्जियां, पनीर, देहीं, दुद्ध बगैरा खरीदी आहनना होऐ पलास्टक दे लफाफे दे बगैर कम्म नेई चली सकदा।

कुसै जमाने च राशन, फल-सब्जियां कप्पड़े-लत्ते ते पैसै-धेलें आस्तै जरूरत दे मताबक कप्पड़ें दे मुट्टे थैले-थैलियां बनाइयां जंदियां हां। अज्ज उनें गी हत्थें च लेइयै बजार जाना जां ते कसरे शान समझेआ जंदा ऐ जां दकियानूसी ख्याल जां असभ्य ते जाहल हरकत। गल्ल बी सच्च ऐ जेकर दुकानदार, हलवाई, सब्जी-फरोश ते बेकरी दा समान बेचने आहले असें-तुसें गी रंग-बरंगे लफाफें च चीजां ते दुद्ध-देहीं बगैरा देने आस्तै त्यार न तां केह लोड़ ऐ घरा दा मैले-कचैले थैले चुक्कियै जाने दी?

एह गल्ल स'ब्बै सूझ-बूझ रक्खने आहले ते पढ़े-लिखे दे जानदे गै न जे पैहलें जां ते चिट्ठी-पत्तरी भेजने आस्तै डाक मैहकमें पासेआ लफाफे छापे जंदे हे ते जां गरीब लोक अखबारी ते खाकी कागजें दे लफाफे बनाइयै दकानदारें गी चीज पाइयै बेचने आस्तै देइयै अपनी रोजी चलाने च मदद करदे हे, पर दसें-पन्दरें बरिं थमां पलास्टक दे लफाफें अपना नेहा बस्तार कित्ता जे सारे लोक इंदे उप्पर गै निर्भर होई गे। इन्ना गै नेई इनें गरीब-गुरबें दी रोजी-रोटी उप्पर बी गलबा पाई लेआ की जे इंदा निर्माण ते कारखाने राहें होंदा ऐ जद के कागजी लफाफे ते गरीब लोक हत्थें कन्नै बनादे न। इस लेई इंदा मकाबला असम्भव ऐ। इस्सै करी कागजी लफाफे दी डिमाण्ड घटी गेई ऐ। घटै बी की नेई, कागजी लफाफें दी नां उऐ नेई क्वाल्टी ऐ नां गै जरूरत दे मताबक उन्नी क्वांटटी च पैदाबार।

इस बारे च अस इयै आखी सकने आं जे असल च जिस लफाफा-संस्कृति ने डाक-लफाफें ते कागजी लफाफें दे रूप च कदें जन्म लेआ हा ओह उसदा आदि काल जां बालकाल हा ते हून ते इसदा जोबन काल ऐ। की जे माहनू दे जोबन-काल च गै उसदे च रंगीलापन ते मस्तानापन औंदा ऐ इसलेई लफाफा-संस्कृति दा बी इसलै जोबन काल ऐ। इस्सै लेई उसदे केई रंग-रूप ते निक्के-बड्डे नखरे रोजाना दिक्खने च औंदे न। पर जिसलै लफाफा-संस्कृति अपने बचपुने च ही तां ओह गरीब-गुरबें दा पालन पोशन करदी होंदी ही। पर हून जिसलै एह जवानी च आई तां मीरें दी झोली च जाई पेई। हून ते लफाफे उंदियें फैक्टरियें च दड़ादड़ त्यार होइयै मारकिट च आइयै लोकें दी सुख-सुबधा दा साधन बना करदे न।

असल च पलास्टक दे इनें लफाफें दे आविष्कार आस्तै लोकें दी जबरदस्त मांग बी ऐह ही। जिनें दिनें एह लफाफे नेई हे तां कागजी लफाफे च केई बारी कोई चीज पांदे सार गै ओह फटी जंदा हा जां रस्ते च फटी जंदा हा तां खरीदने आहले दा खासा नक्सान होई

जंदा हा इसलेईं उनें लफाफें दी अल्पायु जां क्षणभंगुरता दा अहसास बनाने आहले गी, दकानदार गी, गाहक गी ते घरें च जनानियें स'ब्बनी गी होंदा हा। इसलेईं स'ब्बै परमात्मा अगगें इयें प्रार्थना करदे हे जे हे प्रभु, नेह लफाफे बनन जेहडे पक्के-पुख्ते बी होन ते दिक्खने गी शैल-खूबसूरत बी। खीर उंदी परमात्मा ने सुनी। आखदे न आवश्यकता आविष्कार दी जननी होंदी ऐ ते एह बी कुतै पढ़ने च आया- "Voice of people is the voice of God" लोकें दी अवाज परमात्मा दी अवाज होंदी ऐ। बस, इयां होआ हा जन्म पलास्टक दे लफाफें दा। स्पष्ट ऐ जे इंदा जन्म कोई असानी कनै नेईं ऐ होए दा। एह लोकें दियें अरदासें दा नतीजा ऐ। इक मिंट आस्तै जेकर एह लफाफे नेईं बनदे तां अज्ज दे समाज दा किन्ना बुरा हाल होना हा। इस बारे च पाठक अप्पूं अंदाजा लाई लैन। इंदी किरपा कनै लोकें दा ते खास करियै शकीन गभरुएं दा थैलें कोला ते छटकारा होआ। गंभीरता कनै सोचेआ जा तां इनें लफाफें दा आविष्कार इक जरूरत बनी गेदी ही की जे थैले लेइयै बजार सौदे आस्तै जाना अजकल स्टेटस दे खलाफ गल्ल ऐ। उआं इंदे बनने च साढ़े 30-40 साल पैहलें दी बुजुर्ग पीढ़ी दा शीरवाद जरूर ऐ। ओह आखदे होंदे हे जे ऐसा जमाना औना ऐ जे चौल-आटे बी लफाफें च पाइयै बेचे जाने न अर्थात् मंगहाई इन्नी होई जानी ऐ जे चौल-आटे जनेहियां बोरियें च पाइयै बेचियां जाने आहलियां चीजां बी लफाफें च पाइयै बेचियां ते खरीदियां जानीयां न। किन्नी सच्ची सिद्ध होई ऐ उंदी भविक्ख वाणी। मंगहाई देवी ते इनें लफाफें दी किरपा कनै अज्ज चौल, दाल, आटा बगैरा गै नेईं बल्के दुद्ध, देहीं, घ्यो बगैरा बी इनें लफाफें दी किरपा कनै सब किश खरीदना ते बेचना सखल्ला होई गेदा ऐ। हून पाठक अप्पूं समझी सकदे न जे बजुर्गे दी भविक्खवाणी दे मताबक ओह जमाना हून आई गै गेआ ऐ। मंगहाई दी राखसी ने अपना भँकर मूंह बाकेआ तां गै संस्कृति देवी ने अपना लफाफा-संस्कृति आहला रूप प्रगट कित्ता ऐ। अज्ज जिद्धर दिक्खो पलास्टक दे रंग-बरंगे लफाफें दा गै बोल-बाला ऐ। एह लफाफे लक्खें दी तदाद च रोज फैक्टरियें च तयार होआ करदे न ते बंडलें च बज्झी-बज्झी बाहर आवा करदे न ते हर दकाना पर-भाएं ओह करयाने दी होऐ ते भाएं लुहाइयै दी, भाएं फल-सब्जी दी होऐ ते भाएं कप्पड़े जां बेकरी बगैरा दी, हर जगह इनें लफाफें उत्थें अपना खास थाहर बनाए दा होंदा ऐ। कदें कागजें दे लफाफे बनाने दा कम्म घरेलू-लघु उद्योगें दे अन्तर्गत गै औंदा हा जद के हून लफाफा-इंडस्ट्री जेकर हैवी इंडस्ट्री च नेईं तां मीडियम श्रेणी दी इंडस्ट्री ते आखी गै जाई सकदी ऐ।

अजकल ते लोक-मर्द, जनानियां, जुआंटड़ी कुडियां ते गभरू जागत घरा दा पूरी टस्स-पस्स ते शकीनी कड्ढियै निकलदे न ते अपने इद्धर-उद्धर दे कम्म-काज (सरकारी, गैर सरकारी) मकाइयै बापस औंदे मौकै सब्जी, फल, ते होर जरूरता दियां चीजां निक्के बड्डे लफाफें च पाइयै शाम बेल्लै अपने-अपने घर पुजदे न। शाम बेल्लै बजार ते सब्जी मंडी चा, जां कुसै ग्रां दियें दकानें चा बाहर निकलदे, बस्सें, कारें, स्कूटरें ते मैटाडोरें च चढ़दे बेल्लै लोकें गी दिक्खो तां अजीब नजारा सामनै औंदा ऐ। केइयें दे, हत्थें च आलू, प्याज, भट्टे

बगैरा सब्जियां रंग-बरंगे लफाफे कन्नै शोभदे लभदे न, केइयें दे हत्थें च दाल, मसाले, मटेआई बगैरा आहले लफाफें कन्नै सज्जारदे होंदे न जद के केई जुआन-मटेआरें दे हत्थें च बेशकीमती साड़ियें, शालें ते कट-पीसें कन्नै भरोए दे प्रिन्टेड लफाफे अपनी नजाकती दा रंग दसदे लभदे न।

जनक होरें ते अपनी धी सीता दी बिदाई दे मौके पर रोइयै संसारी ममता दे प्रति अपने लगाओ दा सबूत देइयै अपने विदेह खताब गी बट्टा लाई दिता हा, पर लफाफा-संस्कृति दे लफाफे ते पूरे सोलां आन्ने बिदेह न। इंदा चमत्कार दिक्खो जे एह हर मौके पर हर थां, स'ब्बनी दे कम्म आइयै बी पूरी चाली बिदेह गै बने रौंहदे न। इंदे च नां कुसै अपने कन्नै मोह-ममता ऐ ते नां गै पराए कन्नै बैर बरोध। इंदे थमां कम्म लेइयै भाएं कूड़े च सुट्टी देओ ते फही उत्थूं दा चुक्कियै धोई-धाइयै बशक्क फही बरती लैओ। एह म्हेशां निरलेप ते निश्छल गै रौंहदे न। इंदे च दुद्ध पाओ, देहीं पाओ ते भाएं साग-सब्जियां ते मटेआइयां पाओ। ते फही धोओ ते सुच्चे-दे सुच्चे।

जेकर अस होर मती गम्भीरता कन्नै सोचचै तां पता चलदा ऐ जे एह लफाफा संस्कृति अज्ज स्त्रिष्टी दे लगभग हर-तत्त्व आस्तै आकर्षण दा केन्दर बनी गेदी ऐ। कारें-मोटरें, बस्सें, ट्रेनें ते ज्हाजें च सफर करने आहले लोक अपने खाने-पीने दा समान (रुट्टी-समेत) इनें लफाफें च गै पाइयै अपने कन्नै रखदे न, सफर दरान रुट्टी खाने दे मौके पर इनें लफाफें गी गोदा च बछाइयै अपने भोजन दी तृप्ति करी लेंदे न। गैर जरूरी चीजां, जूठ-मरूठ ते रेंहद-खेंहद उंदें च गै लपेटियै चलदी गड्डी बिचा गै बाहर सुट्टी ओड़दे न। इन्ना गै नेई सफर दे दुरान च जेकर ज्यानें बच्चें गी टट्टी-पशाब आवें तां ओह बी इनें लफाफें बिच्च गै कराइयै बाहर सुट्टी दिता जंदा ऐ केई कट्टर भक्त लोक ते अपने भगवान दियें पत्थर ते धातुएं दी मूर्तियें गी बी इनें लफाफें च पाइयै इक थां थमां दूई थां लेई जंदे न। केई पितृ-भक्त अपने माऊ-बब्बै दे फुल्ल बी इंदे च पाइयै हरिदुआरें दा रस्ता पकड़दे न। हून पाठक गै सोचन जे एह सुबधां पैहलें कुत्थें होंदियां हियां। एह सब सुबधां लफाफा संस्कृति दियां गै बरकतां न जिंदे लेई अज्जै दा समाज इंदा बड़ा गै अभारी ऐ। स'ब्बनी दी सुरत भाल रखदी ऐ एह लफाफा-संस्कृति रूपी देवी। लफाफा-संस्कृति मीरी, गरीबी ते जात-पात दे भेदभाव कोला म्हेशां उप्पर ऐ। दूएँ लफजें च एह स्हेई अर्थें च धर्मनिरपेक्षता दी पैरोकार ऐ।

लफाफा संस्कृति दा इक होर चमत्कार दिक्खो। एह लोकें दे बड्डे कोला बड्डे गुनाह गी नी छपैलने दी समर्थ रखदी ऐ। जेकर कुतै कोई कातल कुसै दा कतल करी देऐ तां उसदे मृत शरीर दे टुकड़े इनें लफाफें च पाइयै रफा-दफा कित्ते जंदे न, जेकर कोई नजैज तरीके कन्नै बच्चे गी जन्म देऐ तां ओह बी लफाफा संस्कृति दी किरपा कन्नै अपने गनाह गी छपैली सकदी ऐ। बस, बच्चे गी जन्म दिंदे सार गै उस्सी काले लफाफे च पाया ते बल्लें डोल कुतै

गैहली जां सड़का दे कोने पर छोड़ी दिता। अप्पू बी बरी ते बच्चा बी अपनं भागें जियै ते भाएं मरै। जेकर बद-किसमती कन्नै ओह काएं-कुत्तें दी झत्ती चढ़ी जा तां भलेआं निस्तारा ते जेकर भगवान् दी मेहर कन्नै विश्वामित्तर रिशि दुआरा त्यागी दी शकुन्तला गी सम्हालने आहले कण्व रिशि आहला लेखा कोई दयालू आइयै उस्सी चुक्की लै तां मौजां गै मौजां।

उप्पर किती दी चर्चा राहें लफाफा-संस्कृति दी खासियत ते सामनै आई ऐ ते इस दी हर कम्म च मदद करने लेई महत्त्वपूर्ण भूमका दा बी जिकर होआ, पर ध्यान कन्नै सोचेआ जा तां इस थमां एह धुनि बी निकलदी ऐ जे लफाफा संस्कृति दे द्वारा जुल्में ते गनाहें गी बी बढ़ावा मिलेआ ऐ। पर इस बारे च इयै आखने पौग जे जिसलै कोई चीज चंगैइयां लेइयै औंदी ऐ तां उस कन्नै कदें-कदें कोई बराई बी आई जंदी ऐ। जां इयां आखो जे दियै थल्लै न्हरे आहला स्हाब लफाफा संस्कृति कन्नै बी होई गेदा ऐ।

इत्थें इक गल्ल जरूर बचारने जोग ऐ जे संस्कृति ने अज्जे दे इस तथाकथत सभ्य युग च अपनी गण-संस्कृति आहला रूप प्रगट नेई हा करना लोड़चदा पर इस बारे च ओह बे-कसूर ऐ की जे संस्कृति परमात्मा दी स्त्रिष्टी च इक महत्त्व आहली ते खूबसूरत सिर्जना होंदे होई बी एह अपना अधार माहनू दी शैल-सन्हाकड़ी ते परिष्कृत सोच गी गै बनांदी रेहियै, पर जिसलै माहनू दी सोच गै विकृत होई जा तां संस्कृति दा बी विकृत जां उप संस्कृति आहला ते जां अपसंस्कृति आहला रूप गै सामनै औंदा ऐ। जेकर कुसै जमाने च अजन्ता-एलोरा, कोणार्क, भुवनेश्वर दा लिङ्गराज मन्दर ते पुरी दे जगन्नाथ मन्दर दे भित्ति चित्तरें च नंगे ते अश्लील यौनाचारें दा चित्तरण किता गेआ हा तां ओह माहनू दी बमार ते विकृत जां अति बलासी सोच दा गै नतीजा हा। ठीक इयै हाल अज्ज गण-संस्कृति दा ऐ ते गण-संस्कृति दे असर कन्नै गै लफाफा-संस्कृति दा विकृत रूप बी सामनै आवा करदा ऐ। इयै गल्ल ऐ जे जेकर लफाफा-संस्कृति ने असंगी उप्पर गिने दे केई सुख पजाए न तां इसदी किरपा कन्नै दुख देने दियां-संभावनां बी पेशो-पेश होई गेइयां न।

‘लफाफा संस्कृति’ दी किरपा कन्नै पर्यावरण दा जेहड़ा सन्तुलन बिगड़ियै प्रदूषण गी बढ़ावा मिलेआ ऐ ते कन्नै बिला-बजह हट्टे-कट्टे दुधारू पशुएं दियां जानां गेइयां न उंदा बर्णन करदे मौकै दिल गै कंबी जंदा ऐ। मते सभ्य खुआने आहले लोक (मर्द ते जनानियां) अपने घरें दा गंद-माल इनें लफाफें च जमह करियै घरें दे सामनै नालियें च जां गैहलीं दे दरम्यान च सुट्टियै अपनी सफाई करियै दूएं आस्तै मसीबत पैदा करी दिंदे न। ते जेहड़े साढ़े भाई-बन्धु म्हानगरें च बनी दियें बहु मंजली अमारतें दी पैहली मंजल कोला लेइयै उप्पर आहलियें सारियें मंजलें च रौहदे न उंदे कारनामें आमतौर पर मते गै बेहूदा ते शर्मनाक होंदे न। पैहलें ते इनें मंजलें च रौहने आले लोक अपने दुराजें दे बाहर खाल्ली पीपे रखदे होंदे हे ते जिसलै ओह कूड़े कन्नै भरोई जंदे हे तां उंदे घरे दा कोई बी माहनू जां अप्पू जां नौकरें दे द्वारा ते जां जमेदारें दे राहें थल्लै पुजाइयै जां पुजोआइयै गली च निश्चत जगह पर सुट्टी-

सटाई दिंदे हे, पर हून इनें लफाफें दी किरपा कन्नै एह तथाकथत सभ्य बहुमंजली फ्लेटें दे नबासी उप्परा दा गै छंडु कराइयै अपनी सभ्यता दा नराला प्रदर्शन करी दिंदे न। नतीजे दे तौर पर कदें एह सड़ी-गली चीजें ते कूड़े-करकट कन्नै भरे दे लफाफे आमतौर गैली दे बशकार गै पौंदे न। जेकर उसलै खुदानखास्ता कोई मर्द जां जनानी आप मुहारे होइयै गली च टुरारदे होन ते चानचक्क इयै नेहा लफाफा उंदे उप्पर पेई जा तां उंदा जेहड़ा धराका निकलदा ऐ उसदी ते गल्ल गै छोड़ो पर उस गंदगी कन्नै उंदी जेहड़ी बेशकली होई जंदी ऐ उस कन्नै ओह नक्क-कन्न कटोने दे बाद रावण दी भैन सूर्पनखा कोला बी बुरी होई जंदी ऐ। फही जेकर ओह लफाफे बगदियें नालियें पौंदे न जां जाने-अनजाने सुट्टे जंदे न तां उंदा बगना बी बंद ते गंदा पानी गैलीं च गंद फलांदा इयां बगदा ऐ आक्खो नरक दे दरया च हाड़ पेई गोदा ऐ। नेही हालती औने जाने आहले कदें बिजली दे खंभे गी जप्फे मारदे ल'बदे न ते कदें दकाने दे थढ़ें उप्पर छड़प्पे मारी-मारी उछलियै गैलीं टप्पने दी कोशश करदे लभदे न। जेकर उसलै कदें स्कूटर, कारां ते ऑटो रिक्शे बी औने शुरू होई जान तां फही लैओ ठप्पे गै ठप्पे। उसलै नेह लफाफे सुट्टियै रस्तें दा बुरा करने आहले गी त्रेरियें-त्रेरियें गालीं दे गप्फे गै थ्होंदे न। गल्ल सिर्फ इत्थें गै नेई मुकदी। जिसलै मुन्सपल्टी दे मलाजमें दी पलटन अपने झाड़ू ते डंडे हत्थें च लेइयै ते कन्नै अपने नक्क मूंह लपेटियै कदें-कदाएं अपने स्हाब कन्नै आई पुज्जन तां उंदे मूंहें दा नेह कूड़ै ने भरे दे लफाफे सुट्टने आहलें आस्तै जेहड़े तोहफे टपकदे न उस रस्तै नक्क-मूंह बंद करियै छड़प्पे मारी-मारी ते उछली जाने आहले गी अपने-अपने कन्न बंद करने आस्तै बी मजबूर करी दिंदे न। इस कोला साफ होई जंदा ऐ जे जेहड़ियां बीबी जां साहब होर फ्लैट दियें उपरलियें मंजलें उप्परा गंदगी ते कूड़े कन्नै भरे दे लफाफे सुट्टे न उंदी अकल बी गासै उप्पर गै टंगोई दी होंदी ऐ। कोई भला जेकर इस लफाफा बम्ब दा शकार होई जा तां ओह अपनी किसमत गी ते लफाफे सुट्टने आहलें गी फटकारदा गै घर पुजदा ऐ।

खीर च इयै आखना पौग जे लफाफा संस्कृति कोला असेंगी होर बी बड़ियां मेदां न। मेद ऐ जे एह अपना होर बी मता बस्तार करग तां जे लोकें गी होर मता सुख ते स्थूलतां प्राप्त होई सकन। पर डर इस गल्ला दा ऐ जे हून लफाफा संस्कृति दे खलाफ बी इक म्हाज त्यार होआ करदा ऐ ते सरकार उप्पर दबाव पाया जा करदा ऐ जे इक कनून बनाइयै इनें लफाफें दी पैदाबार उप्पर गै रोक लाई दिती जा। उन्दा आखना ऐ जे एह लफाफे जित्थें केइयें बमारियें दे कारण बनदे न उत्थें इंदी बजा कन्नै प्रदूशन बी फैला करदा ऐ इक मिंट ध्यान लाइयै सोचेआ जा एह गल्ल साफ होई जंदी ऐ जे इंदे दुरपयोग दी बजा कन्नै गै इंदे उप्पर शक्की अंगुलियां टिकन लगियां न। जेकर इंदा सदुपयोग कित्ता जा तां किश नेई बिगडै।

